



Pour lire l'intégralité de nos lettres et documents de référence, consultez notre blog à l'adresse :

<http://Madagascar-Resistance.blog4ever.com>

Madagascar Résistance

Laharana n°49 - february 2011

Taonjato faha 21 : Fandresen'ny fahafahana sa fandresen'ny mpanao didijadona ?

Tao amin'ny laharana faha 43, Désambra 2010, dia nametra-panontaniana izahay hoe : handresy amin'ity taonjato ity ve didijadona maneran-tany, satria toy izao no nosoratanay : « *misy rivotra maloto mitsoka indray manerana ny kontinanta : velombolo indray ny kabary mankahàla vahiny, manavakava-bolokoditra sy mamono fahafahana, ary dia mihitatra any Etazonia, any Eorôpa, any Atsinanana-Afovoany, any Azia hatrany Afrika.* » Ary toa mitombona ny ahiahinay mahita ny fitombo sy fihànak'ireo fitondrana tsy manaraka ny fenitra demokratika eo anatrehan'ny fihemorana'i Etazonia sy Eorôpa eo amin'ny fiharovana ny fenitra demokratika. Izao tontolo izao anefa dia mijery an'i tandrefana ho toy ny mpiaro izany firehana izany. Io fihenana-kery io araka ny efa voalazanay, dia noho ny don-tandroka anatiny ataon'ireo mitàna ny fotokevitra fasista na karazana nazia, izay miha-mahazo vahana satria mahazo toerana hamaharana, ary noho ny fikatoan'ny kapitalisma any Etazonia sy Eorôpa mpampiasa vola tafahoatra, ary koa noho ny fifandajàn-kerin'ny fahefana ekonomika eo anivon'izao tontolo izao. Nihevitra koa izahay fa « *ny tena fahavalon'ny firehana demokratika avy ao anatiny, dia ny tsy fahamaotinan'ny fitondrana tandrefana sy ny hasiny very araka izany, toy izay ireo mpanao don-tandroky ny mpitrifana* ». Ny fampitoviana ny krizy malagasy, ivoariana, ny fihetseham-bahoaka tao Tonizia, ary ny zava-mitranga ankehitriny ao Egypta dia manamafy ny fomba fijerinay.

Misy Didijadona sy didijadona

Nanamafy ny fihetsiky ny filoha frantsay ny fanambarany etsy sy eroa milaza amin'i Laurent Gbagbo hiàla eo amin'ny fitondrana satria karazana « fandrodànam-panjakana » ihany no ataony. **Tamin'ny volana Marsa 2009, dia niaiky io filoha io fa nisy fandrodànam-panjakana tao Madagasikara. Nefa tsy nitaky ny fialàn'i Andry Rajoelina izy, fa nanohana sy mbola manohana azy araka izay azony atao na eo amin'ny lafiny diplomatika, na ara-bola na ara-pitaovana.**

Azo lazaina fa tena nahomby ny fanohanana ara-diplomatika, satria roa taona taty aorian'ny fandrodànam-panjakana tao Madagasikara, dia ny SADC – mpikambana ao anatin'ny Vondrona Fampivelarana an'i Afrika Atsinana- IHANY no nampihàtra ny sazy amin'ny olona voaroiroy araka ny fomba mahazatra. Izany indrindra no nahatonga ny Fikambanana Afrikana, izay nivory tao Addis Ababa, niantso ny mpikambana ao amin'ny Vondrona Iraisampirenena hampihàtra amin'ny fomba hentitra ireo sazy voatondro, tao amin'ny fanambaràna nataony.

Kinga ery ry zareo raha ny momba an'i Laurent Gbagbo sy manodididna azy. Ary inona no azo lazaina momba ny fahakingàn'ny Eoropéana nampikato ny fanànan'i Ben Ali mivady tao Eoropa, sy ny fihazonana ny fiaramanidiny ao Frantsa !

Ity koa misy fampitahàna mahavariana natao-na mpanao gazety ao amin'ny televiziona frantsay momba ny fihetsik'i Etazonia sy Eoropa momba ny fihetsehan'ny vahoaka tonizianina tsy mila an'i Ben Ali, sy ny vahoaka egyptyana mitaky ny fialàn'i Hosni Moubarak izay nanjaka tsy nisy fetra nandritra ny 30 taona (fito taona mihoatra ny an'i Ben Ali) ! « **Aleo ho an'ny Toniziana ny nofinofim-pahafahana, ary ho an'ny Egyptiana ny miaina ny zava-misy** ». Satria hatramin'izao ora anoratanay izao ((01/02/11), dia na i Washington, na ny renivohitra eoropeana iray aza, dia tsy nisy nitaky ny fialàn'ny mpanao didy jadona egyptiana.

Tsy takona hafenina, fa ireo “kingalahy” amin'ny resaka “politika ny zava-misy –realpolitik- dia milaza fa satria i Tonizia ao anatin'ny Maghreb, izany hoe eo ambaravarana'i Eoropa, dia rariny raha toa ka voatahitahin'ireo mpifanolo bodirindrina aminy ao avaratry ny Méditerranée ny Toniziana. Sady voatery manetsikeloka ry zareo tamin'ny fahanginany tamin'ny fiandohan'ny fihetseham-bahoaka teo amboalohany, sy ny fandeferana feno firaisana petsaspetsa tamin'ny mpanao didijadona nandritra ny taona maro.

Ireo “kingalahy” ireo ihany anefa ankehitriny no milaza fa, na misy resaka Méditerranée na tsia, ary na eo aza ny hetahetan'ny vahoaka Egyptiana ho amin'ny fahafahana, dia tokony hanao izay tratry ny hery “hamonjena ny miaramila Moubarak”, ilay namana itokisana.

Rahoviana ihany ireo Tandrefana no ho tonga saina fa io lazaina hoe “realpolitik” io anie, dia tsy inona fahajambàna politika?

Rahoviana ihany izy vao ho tonga saina fa mitora-tena izy amin'ny fanapotehana ifotony ny sata demokratika, nefa dia io indrindra no hideràn'ny firenena maro azy ireo eran-tany, eny hanomezany azy fanajana mihitsy aza?

Tokony hampirisika ny fanaparahana ny sata demokratika i Etazonia sy Eorôpa, noho ny antony roa loha.

Ny voalohany dia antony *stratéjika*; ampitoboana ny isan'ny Fanjakana demokratika izay hanjary namana politika rahatrizay, ary fara faharatsiny ho fanjakana tsy fahavalo. Azo tarafina amin'ny zava-misy ao Pakistan izany, na ao Afghanistan; **ny finamànana antsitraro miainga avy amin'ny firehana iombonana dia mateza lavitra noho ny**

finamànana natao amboetra na mampiasa vola. Ny zava-mitranga ankehitriny ao Maghreb sy ao Moyen-Orient, ary angamba aza any amin'ny toeran-kafa, dia mampiseho fa **ny didijadona dia miteraka fihetseham-bahoaka na ho ela na ho haingana ; ary ny fiafaràn'ny, izay tsy azo fantarina mialoha, dia mety hifototra amin'ny Tandrefana, izay raisina ho mpiaro ny mpanao didijadona noroahin'ny vahoaka nanao sorona ny ainy.**

Ny faharoa dia sady antony ekonomika no politika.

Efa mampivarahontsana ny toekaren'i Etazonia sy Eorôpa ankehitriny ny firoborobon'ny indostria sy ekonomia Sinoa.

Ankoatr'izany, ny **fiankinan-doha ekonomikan'ireo firenena maro eo an-dàlam-pandrosoana amin'ny Shina, dia tsy hahasakana ny fiankinan-doha politikan'ireny firenena ireny, raha tsy misy fomba fitantànana demokratika tafapetraka mialoha ao aminy, ahafahan'ny vahoakany misafidy an-kahalalàhana ny endrika sosialy sy ny namana mifanandrify amin'izany safidy izany.**

Izao no vaovao tsara; **Misy rivo-pahafahana mitsoka ankehitriny, miainga avy any amin'ny tany arabo, ary mety hanenika izao tontolo izao, nanomboka tamin'ny volana Desambra 2010.**

Mampivarahontsana ny mpanao didijadona, ary mandiso ny teti-panoron'ireo diplomaty kingalahy ny fitakiana fototra ho amin'ny fahafahana ataon'ny vehivavy sy ny lehilahy, tsy ankijery fahasamihafana ara-piaviana, na koltoral, na fivavahana.

Ny tena “realpolitik” –politika mifotra amin'ny zava-misy marina- **dia ny miaiky fa misy fitakiana fototra arahana hery tsy azo tohaina manosika ny vahoaka voageja ela loatra.**

Ny tena “realpolitik” dia ny miaiky fa ny fanagejana ny vahoaka no loharano ipoiran'ny mpitrifana ((extremists) **satria very fanantenana.**

Izao no nambarana tanora Alzeriana vao haingana:” *Mbola tsy niaina akory aho dia efa maty. Tsy misy zavatra hafa ho veriko ankoatr'izany*”.

Raha mitombo ny isan'ny mamoifo toy izany, dia ho loza mananontanona izao tontolo iarahantsika miaina izao.

Ny firenena tandrefana izay nangeja azy nandritra ny taonjato efatra dia tompon'andraikitra feno amin'ny manjo ny eran-tany ankehitriny.

Adidiny sady tombotsoa ho azy ny mitantana ireo fitakiana fahafahana misy amin'izao fotoana izao.

Mba tsy taonjaton'ny didijadona ity tanjato faha 21 ity.

**Ireo Mifikitra amin'i Madagasikara
eto La Réunion**